

05-01/20.02. / 18
05-03/20.02.18. Ag

Ibrahim Avdagic

From: "Delić Midhat" <delicmidhat@live.com>
Date: ponedjeljak, 19. februar 2018. 19:25
To: "ibrahim avdagic" <ibrahim.avdagic@zdk.ba>
Attach: Amandmani DF na Zakon o osnovnoj skoli.docx

Klub zastupnika DF - Općina Zvezdica - Općina Zvezdica			
Primljeno: 20.02.2018.			
Opć. jed.	Broj	Prilog	Vrijednost
01-02	981	3	1/18

Poštovani,

U prilogu vam dostavljam AMANDMANE I-VIII na Prijedlog zakona o osnovnoj školi, ispred Kluba zastupnika DF, na daljnje postupanje

S poštovanjem,

Midhat Delić, dipl.ing.maš.

Telefon: +387 32 559 093

Mobitel: +387 61 412 533

Klub poslanika DF u Skupštini Zeničko-dobojskog kantona

Zenica, dana 19.2.2018.

SKUPŠTINA ZENIČKO-DOBOJSKOG KANTONA			
Datum: 20.02.2018.			
Org. jed.	Broj	Prijava	Vrijednost
01	02	981	3/18

SKUPŠTINI ZENIČKO-DOBOJSKOG KANTONA

Predmet: Amandmani na Prijedlog Zakona o osnovnoj školi, dostavljaju se

U skladu s odredbom člana 133 Poslovnika Skupštine ZDK – novi prečišćeni tekst (Sl. novine ZDK 7/12, 12/13), podnosimo amandmane na Prijedlog Zakona o osnovnoj školi, kako slijedi:

AMANDMAN I

U članu 6, stav (2) mijenja se i glasi:

"(2) Nastava u osnovnoj školi se izvodi na službenim jezicima Federacije Bosne i Hercegovine u skladu sa Ustavom Federacije Bosne i Hercegovine.."

Obrazloženje:

Predložena formulacija "jezici konstitutivnih naroda" nije definisana Ustavom BiH niti Ustavom FBiH, i navodi na pogrešan zaključak da je Bosanski jezik samo jezik Bošnjaka kao konstitutivnog naroda. Predlaže se drukčija formulacija, koja je u skladu sa Amandmanom XXIX na Ustav FBiH, koji glasi:

(1) Službeni jezici Federacije Bosne i Hercegovine su: bosanski jezik, hrvatski jezik i srpski jezik.

Službena pisma su latinica i ćirilica.

(2) Ostali jezici mogu se koristiti kao sredstvo komunikacije i nastave.

Ovim amandmanom mijenja se član 1.6. Ustava Federacije Bosne i Hercegovine.

AMANDMAN II

Član 21(Saradnja osnovnih škola) mijenja se u *Član 21 (Saradnja škola)* i glasi:

"Osnovne škole mogu sarađivati i međusobno udruživati zajedničke poslove sa drugim osnovnim i/ili srednjim školama, s tim da svaka škola zadržava svojstvo pravnog lica."

Obrazloženje:

Ovim rješenjem otvara se mogućnost osnivanja i djelovanja školskih centara (na primjer "Muzički školski centar" koji bi obuhvatio osnovnu i srednju muzičku školu). Katolički školski centri su već pokazali da ovakav koncept može uspješno djelovati.

AMANDMAN III

U članu 30, stav (5) mijenja se i glasi:

"(5) Na početku svakog polugodišta, prvi čas nastave počinje intoniranjem himne Bosne i Hercegovine uz obavezno isticanje državnih simbola Bosne i Hercegovine."

Obrazloženje:

Preciznije se definiše vrijeme intoniranja himne – početak nastave je prvi čas svakog polugodišta.

AMANDMAN IV

U članu 31, stav (5) mijenja se i glasi:

"(5) Broj nastavnih sati u redovnoj osnovnoj školi u toku radne sedmice utvrđuje se nastavnim planom i okvirnim programom, s tim da u toku dana učenici nižih razreda (I do IV) ne mogu imati više od 6 nastavnih sati dnevno, odnosno 26 nastavnih sati sedmično, a učenici viših razreda (V do IX) više od 7 nastavnih sati redovne nastave dnevno, odnosno 32 nastavna sata sedmično."

Obrazloženje:

Preciznije se definiše pojam nastavnog sata, jer se u prethodnim stavovima govori o nastavnom satu, a u stavu (5) nije jasno je li to nastavni sat ili sat kao vremenski period od 60 minuta.

AMANDMAN V

U članu 40, iza stava (1) dodaje se novi stav (2) glasi:

"(2) Ministarstvo odobrava školske udžbenike i nastavna sredstva u skladu sa Zakonom o udžbenicima u Zeničko-dobojskom kantonu."

Dosadašnji stavovi (2) i (3) postaju stavovi (3) i (4).

Obrazloženje:

Obzirom na značaj osnovnog obrazovanja za društvo u cjelini, a istovremeno i značaj udžbenika kao osnovnog didaktičkog sredstva u izvođenju nastave, kao i brojne probleme učenika i njihovih roditelja nastale velikom ponudom udžbenika za osnovne škole (za neke predmete čak i po 7 udžbenika) ova materija mora biti uređena Zakonom.

AMANDMAN VI

U članu 40, iza zadnjeg stava, dodaje se novi stav:

"(4) Škole su dužne poduzeti sve raspoložive mjere kako masa školske torbe sa udžbenicima, sveskama i drugim obaveznim priborom koje su učenici obavezni nositi, ne prelazi 10% prosječne mase učenika za dati uzrast."

Obrazloženje:

Zbog preteških školskih torbi dolazi do krivljenja kičme i drugih zdravstvenih problema, tako da treba poduzeti mjere kako bi se to spriječilo. Raspoložive mjere mogu biti:

- za jedan nastavni predmet ne smije se koristiti više od 1 udžbenika i 1 radne sveske
- škole mogu obezbijediti ormariće u kojima bi se čuvali preteški udžbenici i nastavni pribor da ih učenici ne bi morali nositi kući
- prilikom kreiranja nastavnih planova obezbijediti minimalni broj sati tjelesnog odgoja, sa odgovarajućim sadržajima (tjelesne vježbe, joga i sl.) koji bi uklonili posljedice nošenja preteških torbi
- umjesto štampanih mogu se koristiti elektronski udžbenici, itd.

AMANDMAN VII

Iza člana 40, dodaje se novi član 40a, koji glasi:

Član 40a

„(1)Do donošenja Zakona iz stava (2) prethodnog člana Ministarstvo će oformiti Komisije za izbor udžbenika iz svih nastavnih predmeta u svim razredima osnovne škole

(2)Komisije će razmotriti sve ponuđene udžbenike i sačiniti rang listu istih prema broju bodova, dobijenih na osnovu učešća u rangiranju od strane svih nastavnika koji izvode nastavu u osnovnim školama u Kantonu

(3)Ministarstvo će odobriti za svaki predmet, u svakom razredu, dva najbolje rangirana udžbenika prema broju bodova, uz obavezu da prvorangirani udžbenik isključivo bude u upotrebi u naredne 4 školske godine, odnosno do donošenja Zakona o udžbenicima u Zeničko-dobojskom kantonu.

(4)Bliže odredbe o sastavu i načinu rada Komisija iz stava(1) ovog člana, kao i sve aktivnosti vezane za učešće svih nastavnika u procesu rangiranja udžbenika za sve predmete, regulisat će se Uputstvom o sastavu i načinu rada Komisija za izbor udžbenika u osnovnim školama, koje donosi Ministarstvo.

Obrazloženje:

Do donošenja Zakona o udžbenicima u ZDK, koji bi u potpunosti riješio svu problematiku vezanu za udžbenike, ovaj član predstavlja prelazno rješenje, kojim bi se već za narednu školsku godinu ovaj problem znatno ublažio.

AMANDMAN VIII

U članu 72, na kraju stava (3) dodaje se tekst ", te na zvaničnoj web stranici Zeničko-dobojskog kantona."

U članu 72, na kraju stava (4) dodaje se tekst ", te na zvaničnoj web stranici Zeničko-dobojskog kantona."

Obrazloženje:

Da bi se obezbijedila transparentnost pri zapošljavanju, treba koristiti raspoložive tehnologije, koje ne povećavaju troškove, a omogućuju veću pokrivenost javnosti. Prema podacima Regulatorne agencije za komunikacije BiH, u2016. godini u BiH je bilo 2.909.236 korisnika interneta, što znači da je ovo najdostupniji način komunikacije.

S poštovanjem,

Predsjednik Kluba zastupnika DF

Midhat Delić, dipl.inž.